



12. februar 2025

**2024-5**

All. nr./notatnr.:  
2023-145-0003-42  
Sull./sagsbeh.: LR/kl

**Inissiinissaq pillugu kommunip aalajangiinera malinneqanngitsoq aamma meeqqat angerlartinneqartinnagit angerlartitsinissamik aalangiissuteqannginneq akuerineqarsinnaangitsut.**

A'p naammagittaalliutaanik ombudsmandi tigusaqarpoq, saaffiginnissutaa qitornaasa marluk angerlartinneqarnissaat pillugu Kommuneqarfik Sermersooq akissuteqarsimannngilaq.

Kommunimit 25. november 2022-mi akuersissutitalimmik meeqqat angerlarsimaffiup avataanut inissinneqarnissaat aalajangiunneqarpoq. Meeqqat 2. december 2022-mi inissinneqarput. Meeqqat angajoqaatik jullimi najorpaat. Tamatumalu kingorna meeqqat A-mi najugaqaannarlutik.

A 2. februar 2023-mi kommunimut qitornami angerlartinneqarnisaannik noqqaassuteqarpoq.

Kommune 10. maj 2024-mi meeqqat angerlartinneqarnissaat pillugu aalajangiivoq.

Ombudsmandimit akuerineqarsinnaanngitsutut isumaqarfigineqarpoq inissiineq pillugu kommunip aalajanginera atuutitinneqanngimmat, kiisalu aamma meeqqat angerlartinneqarnerat sioqqullugu kommunimit aalajangiisoqaqqaarsimannngimmat. Ombudsmandimit akuerineqarsin-

*naanngitsutut isigineqarpoq, aatsaat ukioq ataaseq qaangiutereersoq meeqqat angerlartinneqarnissaat pillugu kommunip aalajangiinera.*

*Taamatuttaaq ombudsmandimit isorisarialittut isigineqarpoq, kommunip meeqqat pillugit sukumiisumik immikkut ataasiakkarlugit naliliiffigisimanngimmag, meeqqat angerlartinneqarnissaat pillugu immikkut aalajangiinermik naammagittaalliorssinnaanermut ilitsersuutitalimmik.*

*Ombudsmandimit innersuussutigineqarportaaq, siunissami kommunimit qulakkeerneqartassasoq, meeqqat tapersorneqarnissaannut inatsit naapertorlugu, meeqqap angerlarsimaffiup avataanut inissitap angerlarsimaffiminut nuulluni angerlannginnerani angerlartitsinissap aalajangiiffigineqaqqaartarnissaa.*

*Taamatullu ombudsmandimit innersuussutigineqarpoq, siunissami kommunimit qulakkerneqartassasoq, meeqqat tapersorsorneqarnissaannut inatsit naapertorlugu, kommunip angerlartitsinissamik aalajangiinerminut atatillugu, meeraq aalajangiinermik naammagittaallornissamut ilitsersuutitalerlugu nalunaarfigineqartariaqarnissaa pillugu naliliisassasoq.*

*Ombudsmandimit kommune qinnuigineqarpoq inassutigisai pillugit kommune qanoq iliuuseqarnissamut pissutissaqalersinneraa ombudsmandimut nalunaarutigeqqullugit.*

*Ombudsmandi isumaqarmat suliami annertuumik kukkusupeqartoqarsimasoq sumiginnaasoqarsimasorlu, Inatsisartut Inatsisinut Ataatsimiitaliaat aamma communalbestyrelsi oqaaseqaat pillugu nalunaarfigineqarput, ombudsmandi pillugu inatsimmi § 23 tunngavigalugu.*

*(Oqaaseqaat 20. december 2024-meersoq, j.nr. 2023-145-0003)*

## **Tamatuma kingorna imatut oqaaseqaateqarpunga:**

### **1. Suna misissorpara?**

**1.1.** Suliamik suliaqarninni aalajangerpunga, A'p qitornaasa marluk angerlarsimaffiup avataanut akuersissutitalimmik inissinneqarsimasut, kommuni angerlatsititsinissamik aalajangiitinnagu angerlartivillugit angerlartin-neqarsimanerat kisiat isummerfiginiarlugu.

Oqaatigissavara meeqqat inissinneqarnerinut tunngaviusoq isummerfiginngin-nakku, tassunga ilanngullugu inissiinermi siunertarineqartoq. Aamma inissiinermi siunertarineqartoq anguneqarsimanersoq imaluunniit tunngaviusumut siunertaarussimanersoq, kommunip meeqqat angerlartinneqarnissaat pillugu aalajangiinerani apeqqummi isummersunngilanga.

Tamatuttaaq kommunip meeqqat angerlartinneqarnerannut atatillugu ikorsiissuteqarnissamut aalajangiinerat pillugu aamma isummersornikuun-ngilanga.

Naggataatigullu kommunip suliamik suliaqarluni ingerlatsinerata sinneranut isummersorsimanngilanga, tassunga ilanngullugu suliat suliarineqartarnerat pillugu inatsisitigut malittarisassat pingaarutillit eqqortinneqarsimanersut.

Tamatumani innersuutigaara Inatsisartut ombudsmandiat pillugu inatsimmi nr. 7, 1. juni 2017-imeersumi § 14, imm. 1, naammagittaalliuut misissuinissamik aallartitsinermut pissutigissallugu naammannersoq ombudsmandip aalajangis-sagaa.

**1.2.** Ajornartorsiutinik taamaattunik siusinnerusukkut nammineq suliarinnissi-manngikkaangama Qallunaat Nunaanni atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpakka. Kalaallit Nunaanni inatsiseqartitsinikkut tunngaviup Qallunaat Nunaannilu inatsiseqartitsinikkut tunngaviup pingarnerusutigut assigiinnerat tamatumunnga pissutaavoq. Kalaallit Nunaanni inatsiseqartitsinikkut tunngavik Qallunaat

Nunaanni inatsiseqartitsinikkut tunngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2: Suliaq pillugu naatsumik oqaatigisassat
- Immikkoortoq 3: Inatsiseqartitsinikkut tunngavisaq
- Immikkoortoq 4: Kommunip isumaa
- Immikkoortoq 5: Uanga naliliinera

Oqaatigissavara suliap ingerlasimanerata allaaserinera oqaaseqaammut tulliummat.

## **2. Suliaq pillugu naatsumik oqaatigisassat**

Kommune 25. november 2022-mi aalajangiivoq anaanaasup akuersissuteqarneratigut meeqqat angerlarsimaffiup avataanut inissinneqassasut.

2. december 2022-mi meeqqat ilaqtariinnut paarsisartunut inissinneqarput.

12. december 2022 ilaqtariit paarsisartut kommunimut nalunaarput meeqqat paarsariunnaarniarlugit.

20. december 2022-mi kommunimit innersuussutigineqarpoq, namminersorlutik oqartussat aqqutigalugit meeqqat ulloq unnuarlu angerlarsimaffimmut inissinneqassasut.

20. december 2022-mi kommunimit anaanaasoq nalunaarfigineqarpoq, paarsisartut kommunimut nalunaarsimasut meeqqat paarsariunnaarniarlugit. Peqatigitillugu kommunimit nalunaarutigineqarpoq meeqqat ulloq unnuarlu angerlarsimaffimmut innersuunneqarsimasut. Isumaqatigiissutigineqarpoq meeqqat angajoqqaaminnik najorteqartinneqassasut 21. december 2022-miit 6. januar 2023-p tungaanut, imaluunniit meeqqat ulloq unnuarlu angerlarsimaffimmi inissaqalernissaasa tungaanut.

23. december 2023-mi kommune aalajangiivoq inissiivik allanngortillugu, ulloq unnuarlu angerlarsimaffimmut meeqqat inissinnejarnissaannik.

Meeqqat angajoqqaatillu illoqarfik X-miippuk 21. december 2022-miit 6. januar 2023-p tungaanut, arnaata ilinniagaqariartorluni aallarnerata tungaanut. Kingornalu meeqqat ataatartik A illoqarfik X-meeqatigivaat.

17. januar 2023-mi A meeqqat ilagalugit nunaqarfik Z-iliarpoq, utaqqi-innarsinnaajunaaramiuk meeqqat ulloq unnuarlu angerlarsimaffimmi inissaqaler-nissaat.

2. februar 2023-mi arnaat kommunimut nalunaarpoq, angajoqqaatut oqartussaassuseq A-mut tunniunniarlugu. Tassungalu atatillugu A kommunimut nalunaarpoq, nammineq meeqqat angerlarsimaffimmini tigummiinnarusullugit. Ataatsimiinnermi aalajangerneqarpoq meeqqat A-miiginassasut, aammalu arnaata angajoqqaatut oqartussaassusermik A-imut tunniussineranut upernarsaat piniarneqassasoq. Nalunaarusiorluni allattugaatinit ersersinneqanngilaq al-laffiup iluani ataatsimiineq ingerlannejarsimanersoq, A-luunniit ataatsimiinnermi peqataasimanersoq.

Kommune B aamma C pillugit isumaginninnermi misissuinermik suliaqarpoq. Misissuinerit tamarmik 25. januar 2023-mik ulluligaapput, aallarnisarnejarsimal-luni 13. januar 2022-mi. Misissuinerit naammassineqarput 14. april 2023-mi aamma 19. maj 2023-mi. Ersersinneqarpoq A'p B-mut angajoqqaatut oqartussaassuseq tigusimagaa ullormi 13. marts 2023-mi C-mullu ullormi 23. marts 2023-mi. Taamatuttaq misissuinernit marluusunit ersersinneqarpoq, nalilernejarsimasoq meeqqat A-mi najugaqassasut.

10. marts 2023-mi sullissisoq A'p angerlarsimaffianut pulaarpoq. A-mit oqaatigineqarpoq meeqqani qimaqqinniarnagit. C-mit oqaatigineqarpoq ataataminii-ginnarnissani kissaatigalugu, aamma B-mit oqaatigineqarpoq ataataminnut angerlarsimanertik ajorinagu. Sullissisumit A-mut oqaatigineqarpoq, meeqqat inisaqartimmagitt, ulloq unnuarlu angerlarsimaffimmut inissinnejarnissaat pillugu suliaq kommunimit naliliiffingineqassasoq.

19. maj 2023-mi kommune naliliivoq, C angummini najugaqaannarsinnaasoq, inuttaatalu tamanna ajorinngilaa.

23. oktober 2023-mi A uannut naammagittaalliuteqarpoq, meeqqat angerlartin-neqarnissaat pillugu kommunimut saaffiginnissutimi akineqarsimannginnera pillugu.

30. oktober 2023-mi A allakkatigut noqqaassuteqarpoq qitornani angerlartinne-qassasut.

6. maj 2024 kommune A'p angerlarsimaffianut pulaarpoq oqaloqatigineqarporlu meeqqat angerlartinneqarnissaat pillugu.

10. maj 2024-mi kommunimit aalajangiiffigineqarpoq meeqqat A-mut angerlartinneqarnissaat pillugu.

### **3. Inatsiseqartitsinikkut tunngavigisaq**

#### **3.1. Inissiineq angerlartitsinerlu**

Angerlarsimaffiup avataanut inissiisarnermi malittarisassat nalimmassagaapput Meeqqat tapersorsorneqarnissaannut inatsimmi (matuma kingorna meeqqat tapersorsorneqarnissaannut inatsit) nr. 20, 26. juni 2017-imeersumi §§ 27 aamma 28-mi. Tassunga atatillugu periarfissaavoq nukinginnartumik inissiinissamik aala-jangiisinnaaneq meeqqat tapersorsorneqarnissaannut inatsimmi § 6 naapertor-lugu.

Angerlarsimaffiup avataanut inissiinerit ilaanni kommunalbestyrelsi inissiinissamik alajangiisinnaavoq angajoqqaat akuersissuteqartinnerisigut. Meerarlu 15-inik ukioqalereersimappat, aamma kommunalbestyrelsi meeqqamiit allakkatigut akuersissummik piniassaaq. Tamanna meeqqat tapersorsorneqarnissaannut inatsimmi § 50, imm. 1-imi erserpoq. Meeqqat tapersorsorneqarnissaannut inatsimmi § 27, imm. 1-imi ima allassimavvoq:

**“§ 27.** Kommunalbestyrelsip aalajangissavaa meeraq angerlarsimaffiup avataanut inissinneqassanersoq isumaginninnikkut § 45 malillugu misissuinerup takutippagu, meeqqap ikiorserneqarnissamut immikkut pisariaqartitaanik akuersinissamut annertuumik pingaaruteqartoq.”

Pisuni allani angajoqqaatut oqartussaassusilimmik akuersititseqaarani komunalbestyelsi aalajangiisinjaavoq meeqqap angerlarsimaffiup avataanut inissinneqarnissaanik. Tamakku meeqqat tapersorsorneqarnissaannut inatsisip § 28, imm. 1-iani imatut allanneqarsimapput:

**“§ 28.** Kommunalbestyrelsip angajoqqaatut oqartussaassusilik meerarluunniit akuersiseqqaarnagit meeqqap angerlarsimaffiup avataanut inissinneqarnissa aalajangissavaa, meeqqap peroriartorneranut, peqqissusianut ineriarorneranul-luunniit ilungersunartumik ajoquserneqarnissa aarlerinarluinnarpak makku pisutigalugit:

- 1) meeqqamut amigartumik isumassuisoqarpat isumassuisoqanngippalluunniit,
- 2) timikkut tarnikkullu persuttaaneqarsimappat, paarsinerluttoqarsimappat kinguaassiutitigulluunniit innarliisoqarsimappat,
- 3) meeqqami imaluunniit meeqqap qanigisaanik atornerluinermik ajornartorsi-uteqartoqarpat, pinerlunniartoqarpat allatigulluunniit inuuniarnikkut annertuunik ajornartorsiuteqartoqarpat, imaluunniit
- 4) meeqqami meeqqalluunniit qanigisaanik pissutsikkut naleqqussarnissamut al-latigulluunniit ajornartorsiuteqartoqarpat.”

Angerlarsimaffiup avataanut inissiineq unitsinneqassaaq meerarlu angerartin-neqarluni, inissiinermi siunertarineqartoq anguneqarpat, inissiineq tunngavigisamut siunertaaruppat, imaluunniit meeraq 18-inik ukioqalerpat. Meeqqat tapersorsorneqarnissaannut inatsimmi § 40 imatut ersersinneqarpoq:

**“§ 40.** ikorsiinissamik suliniuteqarnerit, ikorsiinissamillu suliuniuteqarnerit immikkut ittut kiisalu ikorsiinissami suliuniuteqarnerit sukannernerit, tak. kapitalini 7-9-ni aalajangersakkat, kiisalu tamakku pillugit suliniuteqareernermeri malitseqartitsilluni suliniutit unitsinneqassapput, taakku malillugit sulinermi anguniar-neqartut anguneqarpata, imaluunniit ikorsiinermik suliniuteqarnikkut siunertineqartut tunngavissaarukkaangata.

*Imm. 2. Inatsisartut inatsisaat una malillugu ikorsiinissamik suliniuteqarnerit kommunalbestyrelsi suliniuteqareernermeri malitseqartitsinissamik aallartitsisoqarnissaanik aalajangiinngippat, unitsinneqassapput meeraq 18-inik ukioqalerpat takuuk § 42.”*

Meeqqat tapersorsorneqarnissaannut inatsisip § 41-ata malitsigivaa, angerlarsimaffiup avataani inissiinerup atorunnaarsinnejarnissaa pillugu kommunalbestyrelsip aalajangiinissaa sioqqullugu, kommunalbestyrelsip qulakkeersimasavai, angajoqqaatut oqartussaassusillip meeqqap pisariaqartitaanik naammassinnissinnaanera, meeqqamik oqaloqatiginnitqarsimanera, kiisalu iliuusissamik pilersaarutip suliarineqarsimanissa.

Angerlartitsinissamik aalajangiisoqarnerata tungaanut, inissiinermik aalajangii-neq atuutitiinnarneqassaaq.

Meeqqat tapersorsorneqarnissaannut inatsimmi § 41, imm. 1-mi oqaaseqaatitaanit ersersinneqarpoq:

”Imm. 1-mut

Aalajangersakkap kommunalbestyrelsi suliniuteqareernermeri malinnaaviginninnissaanut nalilersuisussanngorlugu aalajangiisussanngorlugu pisussaaffilerpaa, tassa inissiinerup atorunnaarsinnejarnissaa sioqqullugu aalajangiisoqaqqaas-saaq, pissutsillu pingaaruteqartut tallimat inissinneqarsimasussaallutik.

[...]"

Meeqqat tapersorsorneqarnissaannut inatsimmi inatsimmiluunniit allami tunngavissaqaangilaq, angajoqqaatut oqartussaassusillip meeraq angerlarsimaffiup avataanut inissitaq, angerlarsimaffimini najugaqartinneqarnissaanut, kommunalbestyrelsip angerlartitsinissamik aalajangiinissaata tungaanut.

Angajoqqaatut oqartussaassusilik noqqaassuteqarpat meeqqap angerlartinneqarnissaanik, kommune aalajangiissaq angerlartitsinissamik imaluunniit akuersissutitaqanngitsumik inissiinissamut. Tamanna atuuppoq, inissiinerusimasoqakuersissutitaqarpat akuersissutitaqanngippalluunniit.

### **3.2. Piffissaq suliap suliarineqarneranut atorneqartoq**

Meeqqat tapersorneqarnissaannut inatsimmi malittarisassaqanngilaq kommunip angerlartitsinissamik suliaqarnerani piffissaq suliap suliarineqarneranut atorneqartoq pillugu.

Taamatullu aamma nalinginnaasumik pisortani piffissaq suliap suliarineqarneranut atorneqartoq pillugu aalajangersaasoqarnikuunngilaq, aamma taamatut inatsisartut inatsisaanni nr. 8, 13. juni 1994-imeersumi suliad suliarineqartarerat pillugu ingerlatsivinni kingorna allaannguusikkami (matuma kingorna suliad suliarineqartarerat pillugu inatsit) inatsisiniluunniit allani.

Tamaattorli ingerlatsinermi ileqqorissaarnerup malitsigivaa, suliad sapinngisamik pisariitsumik pilertortumillu suliarineqartarssasut. Siusinnerusukkut oqaaseqaatiga, suliaq 2019-2, imm. 4.2. innersuussutigaara, tassani siusinnerusukkut suliad - soorlu suliaq 2009-mi ukiumoortumik nalunaarutinni imm. 5-7-2-mi naqinnejqarsimasoq. Tamanna Namminersorlutik Oqartussat "Suliassat suliarineqartarerat pillugu inatsit pillugu ilitsersuut"-mmi (Namminersornerullutik Oqartussat, Inatsisileriffik, december 1994) ersersinneqarpoq:

**"199.** Suliassat tamarmik pisortat ingerlatsiviini suliarineqartartut soorunami sapinngasamik pisariitsumik, pilertortumik aningaasartuutaavallaanngitsumillu suliarineqartarnissaannik piumasaqaat pingaartumik atuuppoq suliassanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni

[...]

**204.** Suliassat suliarineqartarerat pillugu inatsit suliassat qanoq sivisutigisumik suliarineqartarnissaat pillugu nalinginnaasumik aalajangersagartaqanngilaq. Tamatumunnga ilaatigut pissutaavoq suliassat pisortat ingerlatsiviinit suliarineqartartut assigiinnngimmata assigiinngeqisunilu annertussuseqarlutik, taamaattumik inatsisikkut pisortat ingerlatsiviini qanoq sivisutigisumik suliarineqartarnissaasa aalajangersumik malittarisassiornissaat ajornarluinnar-

tussaalluni, tassa eqqartuussivinni ajornarpallaanngitsumik atortinniarneqarsin-naasunik.

Kisiannili Folketingip Ombudsmandiata oqaaseqaatigisartagai tunngavigalugit nalinginnaasumik ingerlatsinermi ileqqorissaarnerup malinniarneqarnissaani su-liassat qanoq sivisutigisumik suliarineqartarnissaat pillugu malittarisassaqr-titsisoqarpoq, matuma ataani suliamut tunngassuteqartup suliap qanoq si-visutigisumik suliarineqassangatinneqarneranik ilisimatinneqartarnissaa ilan-gullugu.

Ombudsmandip aammattaaq aalajangikkat ilaanni tikkuaavigisimavaa suliat sivi-suumik aalajangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangiivigineqanngitsoortarnissaat pinaveersaarniarlugu oqartussaasut naammattumik *atorsinnaalluartunik suliat uterfigeqqin-neqartarnissaannut allattuiffiliortarnissaat.*

Suliami 2019-2-mi aamma oqaatigivara:

"Taamaalilluni piffissaq suliamik suliarinninnermut atorneqartoq suna naammaginartutut isigineqarsinnaanersoq ataatsimut akineqarsinnaanngilaq, sulianili ataasiakkaani pisumik naliliinermik tunngaveqartinneqartariaqarluni.

Oqartussaasup suliaq pisariaqarneratut pilertortigisumik suliarismaneraa nalili-inermi piffissap suliamik suliarinninnermut atorneqartup tamarmiusup saniatigut pissutsit allat aamma isiginiarneqartariaqarput, matumani suliami illua 'tungiusup pilertortumik aalajangiisoqarnissaanik pisariaqartitsinera soqtigisaqarneralu, suliap pissusia ajornakusuussusialu, oqartussaasup misis-sugassaata annertussusiisa piffissallu oqartussaasup suliani taamatut ittuni suliarinninnermut atortagaata isiginiarneqarnissaat ilanngullugit eqqarsaatiga-lugit.

Suliani arlalinni allani piffissaq oqartussaasup suliamik suliarinninnera pillugu oqaaseqarpunga. Suliat 2011-mi ukiumoortumik nalunaarutinni immikkoortumi 5.7.1.-imi 2005-imi ukiumoortumik nalunaarutinni kalaallisuuani quppernermi 69-imi qallunaatuanilu quppernermi 56-imi ilanngunneqartut ilaatigut inner-suussutigaakka. Suliaq kingullertut taaneqartoq ombudsmandeqarfimmi "gangaanerungaatsiartoq" periaatsimut innersuussutinik imaqarpoq. Suliaq

2018-3 nittartakkanni tamanut saqqummiunneqarsimasoq aammattaaq inner-suussutigaara.

Uanga paasinninera unaavoq, suliassaqrifimi tessani inatsiseqartitsinikkut tunngavik Kalaallit Nunaanni Danmarkimilu pingarnerusutigut assiguittoq. Taamaattumik Danmarkimi inatsisilerineq pillugu atuakkiat piffissaq pisortani oqartussaasut sulianik suliaqarnerminnut atortagaat pillugu piumasaqaatit allaaserineqarneranni naggiutitut sulianik suliarinninnermut atortagaat pillugu piumasaqaatit allaaserineqarneranni naggiutitut innersuutigaakka, matumanilaatigut Niels Fengerip allallu atukkiaanni "Forvaltningsret"-imi (2018-imeersumi) quppernerit 688 tulliilu aamma Hans Gammeltoft Hansenip allallu atukkiaanni "Forvaltningsret"-imi aappassaanik naqitertinneqartumi (2002-meersumi) quppernerit 903 tullialu ilanngullugit eqqarsaatigalugit."

2019-2-mi oqaatigivara, suliami 2019-2-tut ittumi, angajoqqaatut oqartussaassilik meeqqap angerlartinneqarnissaa pillugu noqqaassuteqarnermi akuersis-sutitalimmik inissitamik, kommune isummertariaqaraluarpoq, noqqaassut akuerineqassanersoq sapaatip akunnialunni imaluunniit sivisunerpaamik qaamatit arlaqanngitsut iluanni.

Innersuussutigaara suliaq 2023-5, nittartakkanni tamanut saqqummiuneqartoq, kiisalu piffissaq suliap suliarineqarneranut atorneqartartoq pillugu Oqartussaasunut ilitsersuusianniittooq.

### **3.3. Naammagittaalliuuteqarsinnaaneq**

Angerlartitsinissaq pillugu aalajangiineq angajoqqaatut oqartussaassusilimmut aalajangiinerussaaq. Aalajangiineremi malinneqassapput suliat suliarineqarnerat pillugu inatsisip malittarisassai malillugit aamma ilaatigut imaqtinnejassaaq naammagittaalliorissamut ilitsersummik, tak. suliat suliarineqartarnerat pillugu inatsimmi kapitali 6 aamma 7.

Tassunga atatillugu meeqqat tapersorneqarnissaannut inatsimmi § 60, imm. 2-mi ersersinneqarpoq, meeqqat suliani imminnut tunngasuni naammagittaalliorissinnaatitaapput.

Aalajangersakkap taassuma oqaaseqaatitaani makku ersersinneqarput:

"Imm. 2-mut

Aalajangersakkami aalajangiunneqarpoq meeraq naammagittaalliorsinnaati-taasoq. Tamanna inatsimmut ilanngunneqarpoq. Naalagaaffiit Peqatigiit Meeqqanut isumaqatigiissutaanni aalajangerneqarpoq meeqqat pisinnaatitaaffe-carnerat, qulakkeerumallugu. Meeqqat tamarmik tusarneqarnissaq pisinnaati-taaffigaat meeqqamullu tunngasuni tamani peqataatinneqartussaalluni, naammagittaalliorsinnaanerullu ilanngunneqarnera tamatuminnga nukittorsaa-neruvoq malunnaateqarluartoq. Aalajangersakkami aallaaviuvoq meeqqat qas-sinilluunniit ukioqaraluarunik tamarmik naammagittaalliorsinnaanerat, meeqqalli illersornissaa eqqarsaatigalugu kommunimi ingerlatsiviup meeqqap naammagit-taalliorsinnaaneranik ilitsersuummi qulakteertariaqarpaa suliani tamani ersaris-sumik meeqqamut ataatsimut tunngasuinnarmik nalilersuisarnissaq, meeqqap naammagittaalliorup kingunerisinnaasai pilllugit paasinninnissaminut naammat-tumik inerisimanera eqqarsaatigalugu. Eqqarsaatiginninnerit isumali-utiginninnerillu tamakku ingerlatsiviup meeqqamik naammagittaalliornermut ilitsersuutaani ilaasariaqarput aammalu naammagittaalliornermut ilitsersuum-mut meeqqamut paassisutissiissutigineqarsimassallutik."

Meeqqat naammagittaalliorsinnaatitaaneranni aalajangersakkami ersersinneqan-ningilaq qanoq ukioqarnissaat. Aallaavik tassaavoq, meeraq kinaluunniit qanor-luunniit ukioqaraluaruni naammagittaalliorsinnaatitaasoq. Tamatumani pi-umasaqaataavoq meeqqap imminut paasinartumik aalajangiiffigineqarsimanera kiisalu naammagittaalliuuteqarnissaminut ilitsersorneqarsimanera. Tamaattumik communalbestyrelsi suliat ataasiakkaarlugit sukumiisumik nalilersuisassaaq, meeraq ima inerisimatiginersoq aalajangiinerup naammagittaalliuuteqassagunilu kingunerisassaanik paasinnissinnaasariaqarluni.

Suliami 2020-5-imi oqaatigaara, paasinninnersa unnaasoq, angajoqqaatut oqartussaassusilimmut aamma meeqqamut pingaaruteqartorujussuusoq, anger-lartitsinissami aalajangiisoqarnersoq imaluunniit angerlartitsinissamik itigiar-titsisoqarnersoq. Taamaattumik angerlartitsinissamik aalajangiineq imaluunniit angerlartitsinissamik itigartitsineq allakkatigut nalunaarutigineqartariaqarpoq,

aamma angajoqqaatut oqartussaassusilik meerarluunniit aalajangiinermut isumaqataanngikkaluarpas.

Tassunga atatillugu siusinnerusukkut oqaaseqaatigisimasara innersuussutigaara, nittartakkanni tamanut saqqummiunneqarnikuusoq, suliaq 2023-5. Aamma innersuussutigaara nalunaarusianni 2023-mi ilanngutassiaq "2.2 Kommunip aalajangiineratigut meeqqat angerlarsimaffiup avataanut inissinneqarneranni imaluunniit angerlartinneqarneranni meeqqat naammagittaalliuteqarsinnaatitaanerat".

#### **4. Kommunip isumaa**

Kommunimit allakkatigut 8. januar 2024-mi makkua oqaatigineqarput:

"Meeqqanut Ilaqutariinnullu Ingerlatsiviup siullermik piffissap suliap suliarineqarneranut atorneqartup, [A'p] qinnuteqaataani [B'p] cpr.: [...], kiisalu [C'p] cpr.: [...] angerlartinneqarnissaat pillugu sivilsuallaarsimanera ajuusaarutigivaa.

Meeqqanut Ilaqutariinnullu Ingerlatsiviup Inatsisartut Ombudsmandianut oqaatigisinnaavaa, ingerlatsivik 30.10.2023-mi ataataasup [A'p], meeqqat [B'p] kiisalu [C'p] angerlartinneqarnissaat pillugu qinnuteqaataa tigusimam-magu.

Meeqqanut Ilaqutariinnullu Ingerlatsiviup piffissami tamatumani unamminartorsimavoq sullissisut napparsimasarnerinik suliamik nangitsisinnaasunik. Taamatullu aamma Meeqqanut Ilaqutariinnullu Ingerlatsivik unamminartorsimavoq angerlarsimaffimi pissutsit misissorniarlugit nunaqarfimmut [Z-mut]. Tamatumunnga atatillugu Meeqqanut Ilaqutariinnullu Ingerlatsivik sullissumik angalasartussamik atorfinitssisimavoq, kommunip nunaqarfiini illoqarfiillu sinerini ukkatarinnittussamik.

Meeqqanut Ilaqutariinnullu Ingerlatsivik tunngavilersuutit taaneqartut tunngavigalugit ajuusaarpooq [A-mik] utaqqisitsisimaneq pillugu, kisianni ingerlatsivimmit [A'p] [B'p] aamma [C'p] angerlartinneqarnissaat pillugu qinnuteqaataa suliarineqarnissaa salliuutinneqarpoq."

Kommunimit oqaaseqaat 25. april 2024-mi imaattoq tiguara:

**"Suliap ingerlariaqqinnissaanut ilisimatitsissut"**

Meeqqanut Ilaqtariinnullu Ingerlatsivimminngaaniit ilisimatitsissutigissavarput [A] angerlartitsinissamut qinnuteqaataa Meeqqanlut Ilaqtariinnullu Ingerlatsisis- vimminngaaniit aallartinneqartussaanikuugaluarmat peqquteqartumilli nuna- qarfimmut [Z-mut] angalanissat ingerlanneqarsinnaanngimmata rejsende sags- behandlereqalernissaq utaqqisinneqarnikuuvvoq.

Maannamut pilersaarutit imaapput:

- 6. majimiit 8. maj tungaanut rejsende sagsbeandler nunaqarfimmut [Z- mukassooq] meeqqamik angajoqqaamillu oqaloqatiginnikkiaortorluni meeqqat angerlarsimaffimmi qanoq innersut aammalu meeqqat anger- larsimanerat ataataasumut qanoq innersoq tusarniarlugit.
- Nunaqarfimmi [Z-meereernerup] kingorna rejsende sagsbeandler qin- nuteqaasiussaaq angerlartitsinissaq akuerineqassanersoq imaluunniit iti- gartitsissutigineqassanersoq aalajangiisussap, tassa pisortap aaliangis- suaa.
- Angerlartitsinissaq akuerineqarpat aaliangiinermut allagaqaasiortoqas- sooq tassanngaanniillu meeqqat angerlartutut system iluani nalunaars- oqqalissapput.
- Kisianni angerlartitsinissaq itigartitsissutigineqassagaluarpat suliap killif- fianiit [A] suleqatiginiarneqaqqaartussaavoq.

Nunaqarfimmut [Z-mut] tikeraareernerup kingorna suliaq nalilorsorneqaqqit- tussaassooq piaartumilli aaliangiisoqarnissaanut qinnuteqaasiortoqarumaarpoq maannakkut ulluleqqissaarsinnaanngikkaluagit, kisianni naatsorsuutigineqarsin- naavoq qaammatit marluk iluanni angalalanerit allaffisornerillu piumaartut."

10. maj 2024 kommunimit oqaatigineqarpoq:

**"Una pillugu: [A] pillugu naammagittaalliut, nanginnera.**

**Nunaqarfik [Z-mut] angalareernerup kingorna aalajangiineq.**

Ulloq 25. april 2024 allakkatigut nalunaarutiginikuuarput, qulaani pineqartoq pillugu nunaqarfimmukartoqareerpat allakkatigut killiffimmik paasissutissiis-salluta.

Massakkut angalasoqarsimalerpoq, kiisalu suliamik tigummiaqartoq maannamut killiffiusumik imatut paasissutissiivoq.

Ulloq 6. maj 2024 ilaqtariinnik suliaqartoq angerlarsimaffimmut pulaarpoq, pi- umasaqaataasut malillugit nalilersuineq ingerlanneqarpoq, kiisalu angerlarsi-maffik aamma misissorneqarluni, naliliinerlu malillugu akuerineqarluni.

Ulloq 8. maj 2024 [B] oqaloqatigineqarpoq, kiisalu august 2024 illoqarfik [X-mi] elevhjemmernissaa ilanggullugu eqqartorneqarluni. Oqaloqatigiissutigi-neqartussat nalilersuinerillu malillugit siuariartoqarsimanera takuneqarsinnaal-luарpoq. Meeqqat angerlarsimaffimmi toqqissismallutik inooqataapput, kissaa-taat malillugu ataataminnut angerlaqqinnissaat tusaatissatut tigullugu sagsfrem-stilling sananeqassaaq tapersiinermik siunertalik.

Ulloq 7. maj 2024 sagsfremstilling sananeqarpoq, meeqqanik angerlartitsinis-samik siunertalik, taannalu akuerineqarpoq.

Massakkut angerlartitsiniarnermut aalajangiinissamut allakkiaq maanna isuma-gineqarpoq, nassiunneqassalluni meeqqat angutaannut [E-mut] [A-mik allaqqas-sagunarpoq, uanga isumaga]. Aamma ilaqtariit BFC-mut innersunneqarnissa-mik akuersipput ilaqtariit malinnaaffigineqarlutik. Taamaasilluta suliaq maanngaannik naammassivarput."

Kommunimit 25. juni 2024-mi oqaatigineqarpoq:

"Matumuuna nalunaajaat

1. Ilannunneqartumi, meeqqat [C] aamma [B] angerlarsimaffiup avataanut inissinneqarnissaannut anaanaasoq piffimmi tessani angajoqqaatut oqartussaassuseqartoq akuersilluni atsiorpoq, ullulerneqartumi 24. november 2024. Angajoqqaatut oqartussaassuseq [A-mit] tiguneqarpoq 13. marts 2023.

Meeqqat 2. december 2022-mi illoqarfimm [X-mi] ilaqtariinnut paarsisartunut inissinneqarput.

2. Meeqqat angajoqqaatik juullisioqatigissallugit angajoqqaaminnut 22. december 2022-mi angerlarput, angajoqqaat marluullutik nunaqarfik [Z-miit] illoqarfik [X-mukarput], tassanilu [D'p] paasivaa meeqqat ilaqtariit paarsisartunit iperarniarneqartut sullissisumiillu maannakkut sulissutigineqartoq meeqqat ulloq unnuarlu paaqqinniffimmut inissinneqaannarnissaat. Meeqqat ulloq unnuarlu paaqqinniffimmut inissinneqarnissamik tungaanut angajoqqaaminnut angerlarallartinneqarput.
3. [A] meeqqallu nunaqarfik [Z-mi] oqaloqatigineqarput 23. juni 2023-mi (anaanaasoq illoqarfimmut [Å-mut] nuussimavoq). [C'p] aamma [B'p] kisalu [A'p] oqaloqatigereerneranni sullissisumit nalunaarutigineqarpoq, ulloq unnuarlu paaqqinniffimmut inissiinissap taamaatinnissaa sulissutigineqasasooq.
4. Suna pillugu maj 2024 sioqquillugu angerlartitsinissamik aalajangiinerup pisimannginnera sullisisut amigarnerannik peqquuteqarpoq. Angerlartitsineq pillugu aalajangiinermi allagaq ilanngussatut ilanngunneqarpoq.”

## **5. Uanga naliliinera**

### **5.1.**

A'p qitornai 2. december 2022-mi akuersissutalimmik angerlarsimaffiup avaataanut inissinneqarput. Juulli 2022-mi najortigueeqatigiinnermut atatillugu 21. december 2022-miit meeqqat angumminniiginnarput.

2. februar 2023-mi A'p oqaatigaa qitornani angerlarsimaffimmini tigummiinnarusullugit. Aalajangiisoqarpoq meeqqat A-miiginnassasut, aammalu arnaata angajoqqaatut oqartussaassusermik A-mut tunniussinerata upernarsaatitaa piniarneqassasoq. Oqaatigissavara, ersersinneqanngimmat ataatsimiinnermi tamatumani A peqataasimanersoq, aalajangiisoqarmat meeqqat A-miiginnarnissaat pillugu. Taamatullu aamma ersersinneqanngilaq A aalajangiinermik kommunimit paasitinneqarsimanersoq.

Tamatuma kingornatigut meeqqat marluutillugit isumaginninnikkut misissuiffigi-neqarneri ingerlatiinnarneqarput, naammassineqarlutillu ulluni 14. april 2023 aamma 19. maj 2023-mi. Misissuinernit ersersinneqarpoq meeqqat marluullutik ataataminiiginnarusuttut, taamatullu A-mit oqaatigineqarluni, meeqqat imminerminiiginnarnissaat kissaatigalugu.

Kommunimit ullormi 10. maj 2024-mi meeqqat angerlartinneqarnissaat aalajan-giivigineqarpoq.

Naliliinera unaavoq, kommunimit inissiinissamik aalajangiineq aalajangiusimane-qartussaasimagaluartoq, kommunip pisariaqartunik suliami siuariaatinik suli-aqarnissaata tungaanut, angerlartitsisoqassappat aalajangiisoqannginnerani aamma meeqqat angerlartinneqarnerat pitinnagu.

Taamatuttaaq naliliinerivara, A'p 2. februar 2023-mi meeqqat imminerminiitiin-narniarlugit oqariartuuta, meeqqat angerlartinneqarnissaannik noqqaassutitut isigineqartussaasimagaluartoq.

Naliliininnut tassunga ilutigitillugu, kommune aalajangiisimasussaagaluartoq akuersissutitaqanngitsumik angerlartitsinermik imaluunniit, sapaatip akunnialu-isa qaammatialuilluunniit qaanngiunneranni angerlartitsinermik.

Akuersaarneqarsinnaanngitsutut isumaqarfigivara, kommunimit inissiinissamik aalajangiineq atuuttuutinnejannginnera kiisalu, meeqqat angerlartinneqarnerat sioqqullugu angerlartinneqarnissaannik aalajangiisimannginnera.

Taamatuttaaq akuersaarneqarsinnaanngilaq ukioq ataaseq qaaingiutereersoq aatsaat meeqqat angerlartinneqarnissaat pillugu aalajangiisoqarnera.

Allagaatit tigusimasakka tunngavigalugit kommune sukumiisumik meeqqat ataa-siakkaarlugit naliliiffigisimanngilai, meeqqat immikkut ima inerisimatiginersut, paassisallugu angerlartitsinermik aalajangiinerup kingunerisinnaasaanik aamma naammagittaalliorqassappat meeqqat aalajangiinermik iltsersuutitalimmik tu-nineqarnissaat pillugu.

Tamanna akuersaarneqarsinnaanngitsutut isumaqarfigivara, tassami meeqqat tapersorsorneqarnissaannut inatsisip § 60, imm. 2-ani piumasaqaataasumi siunertarineqarmat meeqqat suliani imminnut tunngasuni pisinnaatitaaffimminnik isummersinnaanerannik.

Inassutigaara siunissami kommunimit meeqqat tapersorsorneqarsinnaaneranni inatsit naapertorlugu qulakkeerneqartassasoq, meeraq angerlarsimaffiup avataanut inissinneqarsimasoq angerlartinneqartinnagu, angerlartitsinissamik aalajangiisoqqaartarnissaq.

Inassutigaarattaaq kommunimit qulakkerneqartassasoq, kommunimit angerlartitsinissaq pillugu aalajangiinermi naliliiffigineqqaartassasoq meeraq aalajangiiner mik naammagittaalliorsinnaanermut ilitsersuutitalimmik nalunaarfigineqartariaqarnersoq.

Kommune qinnuigaara uannut nalunaarutigeqqullugu, inassutikka kommunip iliuuseqarnissaanut pissutissaqalersitsinersut.

Paasinninna malillugu suliami annertuumik kukkusqarsimavoq sumigin-naasoqarlunilu, taammaattumik Inatsisartut Inatsisinut Ataatsimiititaliaannut aamma kommunalbestyrelsimit ombudsmandi pillugu inatsimmi § 23 malillugu nalunaaruteqarpunga.

Allakkat uku assilinerat A-mut nassiuppakka.

Oqaatigissavara oqaaseqaat una inuttassarsisinnaajunnaarlugu nittartakkani tamut saqqummiunneqassammat 2024-mullu nalunaarusianni eqqaaneqarumaarluni.

## **SULIAP INGERLASIMANERA**

Ullormi 24. november 2022-mi D akuersissuteqarpoq, meeqqat, B aamma C, angerlarsimaffiup avataanut inissinneqarsinnaasut. Akuersilluni uppernarsaammit erserpoq, tassunga ilaatinneqartut meeqqat ulloq unnuarlu angerlarsimaffimmut utaqqisuniilersinnaasut, ilaqtariit paarsisartut peqatigalugit nakorsiarsinnaasut, paasissutissanik piniartoqarsinnaasoq aamma ilaqtariit paarsisartut meeqqanut pas-iliortitsisinnaasut.

Kommunimit 25. november 2022-mi aalajangiiffingineqarpoq meeqqat akuersissutitalimmik angerlarsimaffiup avataanut inissinneqassasut. Aalajangii-neq D-mut aamma A-mut aalajangiiffiupput. Aalajangiinermi illu ilatigut erserpoq:

"Ilissi, [D] aamma [A] tamanna isumaqataaffigalugu suleqataaffigivasi, ilissi angajoqqaatut oqartussaassusermik peqartutut suliamic attuumassuteqarnersi aamma matumani pissutsit takutippaat ilissi meeqqasi [B] aamma [C] ulloq unnuarlu angerlarsimaffimmut imaluunniit angajoqqaarsianut paarsisartunut inissinneqar-nissaat akuerseqataaffigigissi."

30. november 2022-mi kommunimit isumaginninnikkut C pillugu naliliisoqarpoq, ikorsiinerup/angerlarsimaffiup avataanut inissiigallarnerup aallartinneqarnera tunngavigalugu.

Nalunaarsuilluni allagaatinit 2. december 2022-meersutigut erserpoq, ulloq taanna meeqqat ilaqtariinnut paarsisartunut inissinneqartut.

Ilaqtariit paarsisartut e-mailiannit 30. november 2022-meersumit erserpoq, ilaqtariit paarsisartut sivisunerpaamik piffissami pinasuartumik inissiinerme meeqqat paarisinnaallugit, ajornanngippat arnarsiaasup 29. december 2022-mi aallarnissaata tungaanut.

Nalunaarsuinerme allattugaq ullulerneqanngitsoq pigineqarpoq, tassa meeqqat ulloq unnuarlu angerlarsimaffimmut namminersorlutik oqartussat aqqtigalugit inissinneqarnissaat 20. december 2022-mi innersuussutigineqarsimasoq.

Nalunaarsuinermi allattugaatinit 21. december 2022-meersumit erserpoq, kommunip 15. december 2022-mi arnarsiaat oqarasuaatikkut oqaloqatigisi-magaa ilaqtariittut paarsisartut meeqqanik paarsiunnaarnissamik kissaateqar-nerat aallaavigalugu. Ilaatigut allattukkamit ersersinneqarpoq, ilaqtariit paarsisartut 12. december 2022-mi kissaateqarsimasut, sapinngisamik piaarnerpaamik meeqqat allamut inissinneqassasut.

Nalunaarsuilluni allattukkani 21. december 2022-meersumit erserpoq, kommune anaanaasumut sianersimasoq nalunaarfigalugu, angajoqqaarsianit meeqqat iperarniarneqartut, meeqqallu ulloq unnuarlu angerlarsimaffimmut innersuunneqartut. Allattukkanit erserpoq:

"Arnaa [D] sianerfigineqarpoq paasitinneqarlunilu angajoqqaarsiaasut iperaru-sullugit nalunaaruteqarmata, ulloq unnuarlu angerlarsimaffimmut inissinne-qarnissaat suliniutigineqartoq. Arnaa uggorerpaluppa allamut inissittaria-lermata, oqarlunilu allamut inissinneqartariaqanngikkaluartut.

Juullisiornissai pillugit qanoq kissaateqarnersoq aperiganni, illoqarfik [X-mut] juullisiorianerarput ulloq 21-12-2022 nal. 18:00 missaani tikissallutik illoqarfik [X-mut] juullisiorianarlutik. Ilaqtariiullutik ([A], [D], [B], [C]) pingasunik sinittarfilimmi inissaqarlutik. Januar 6-ni [D] illoqarfik [Å-mukarniarluni] oqaatigaa. Angutaa [A] 11. januar tungaanut illoqarfik [X-miissanerarpaa].

Samvær-qarnissaat ulloq 21-12-2022-ianii 6. januar tungaanut imaluun-niit ulloq unnuarlu angerlarsimaffimmut inissinneqarnissaasa tungaanut meeqqat angajoqqaatik ilagissavaat.

Arnaa paasitinneqarpoq ulloq unnuarlu angerlarsimaffimmut qinnuteqaatin-neqartut, selvstyrekkoorlugu. Paasinnippoq. Ajorinagulu inissinneqarnissaat."

23. december 2022-mi kommune aalajangiivoq inissiivik allangortillugu, meeqqat ulloq unnuarlu angerlarsimaffimut inissinneqarnissaannik. Aalajangiineq angajoqqaanut tunngatinneqarpoq.

C-mut iliuusissatut pilersaarut pigineqarpoq. Iliuusissatut pilersaarut 27. december 2022-mik ulluligaavoq. Immersugassat ilaat immersorneqanngillat, iliuusissatullu pilersaarut naammassineqanngitsutut isikkoqarluni atsiorneqaranilu.

B-mut iliuusissatut pilersaarut pigineqarpoq. Iliuusissatut pilersaarut 6. januar 2023-mik ulluligaavoq. immersugassat ilaat immersorneqanngillat, iliuusissatullu pilersaarut naammassineqanngitsutut isikkoqarluni atsiorneqaranilu.

Nalunaarsuilluni allattugaq 16. januar 2023-meersoq pigineqarpoq. Allaaserinninnermi allanneqarsimavoq "Ataataasoq + [C] oqaloqatigineqarput. Ulloq 6. januar arnaa illoqarfik [Å-mut] aallarpoq, ataataasullu meeqqat kisimeeqatigilerluguq." Nalunaarsuilluni allattukkamit erserpoq:

"Meeqqat angajoqqaarsianut inissikkaluareernerminni kingorna angajoqqaatik illoqarfik [X-mut] juulliliarneranni juulliseeqatigereerlugit ulloq unnuarlu angerlarsimaffimi inissinneqarnissaasa tungaanut ataataasup ilagivai. Socialstyrelse SFU amigaatigimmassuk utaqqissunneqarput. Ataataasorlu utaqqepeqqissinnaangimmat meeqqat nunaqarfik [Z-mukaqtiginiarlugit] aalajangerpoq toqqissismaniassammata, inissiivimmik suli utaqqisoqarmat."

Nalunaarsuilluni allattugaq 18. januar 2023-meersoq pigineqarpoq. Allattukkani ilaatigut erserpoq, meeqqat 17. januar 2023 ataatartik, A nunaqarfik Z-mut aallaqatigigaat.

Isumaginninnermi misissuineq B pillugu 25. januar 2023-meersoq pigineqarpoq. Tassannga ersersinneqarpoq misissuineq aallartinneqarsimasoq 13. december 2022-mi naammassineqarsimallunilu 14. april 2023-mi. Ilaatigut ersersinneqarpoq A'p 13. marts 2023-mi kisimiilluni angajoqqaatut oqartussaassuseq pigilersimaga. Misissuinermit ilaatigut ersersinneqarpoq:

"[...]

## **Eqikkaaneq**

[B'p] angajoqqaavi [...] -mi" sulinerminni, nunaqarfik [Z-mi] ittukkuminni paari-neqarlutik najugaqarnerminni, ittuminit kinguaassiutitigut qaangiiffigitinnerminik 20.11.2022 kingorna Isumaginninnikkut misissuineq aallartinneqarpoq. [B] it-tuminiit kinguaassiutitigut qaangiiffigitereernerata kingorna angerlarsimaffiup avataanut qatanngutinilu nukarleq, arnaa akuersineratigut inissinneqaraluarpit. Ullut 12 angajoqqaarsianeereerlutik angajoqqaarsiaasut iperarusummatigut angajoqqaanut angerlarteqqinnejarpit. [B] qatanngutinilu ataatartik kisimi ilag-lugu nunaqarfik [Z-mi] najugaqarput, arnaa naluaat nunaqarfik [Z-mut] tikeqqissanersoq.

[...]"

## **Suliamik naliliineq**

Meeqqanut Ilaqtariinnullu Ingerlatsivik, Isumaginninnikkut misissuinermi oqaloqateqarnikkut oqaaseqaatinillu aallerneremi pissarsianiit paasisat aallaavi-galugit naliliivoq:

- [B] oqaloqatigineqaqartalernissaanguniarneqassasoq, ulluinnarni inuunermi pisoq apeqquterpassuit eqqarsaaterpassuit atugai pillugit oqilisaataasin-naammata aqqutissiuunneqarnermigut kaammattorneqarnermigullu.
- [B] angajoqqaarsianit iperarneqarnermi kingorna ataataminut uteqqinnerat, ataataasullu angajoqqaatut oqartussaassuseq tamakkiisoq tigummilernerani, illumillu attartugaqalerlutik toqqissimasumik ineqalernikuunertik, ataataalu nunaqarfik [Z-mi] suliffeqalernikuunera meeqqamut toqqissismatitsimmat ataatamini najugaqarnissaat nalilerneqarpoq.
- Nalilernearpoq angajoqqaat aanngaajaarniutinik atornersuisuuneq pillugu katsorsartinnissaat, meeqqat toqqissimasumik angerlarsimaffeqarnissaat aalaakkaasumillu ulluinnaqarnissaat kiisalu attaveqarluarnissaat anguniar-lugu.
- [B] unnuami eqqumasarnera, mobil-ertarnera, qasoqqallunilu atuartarnera, atuarfimmi malunniuteqartarmat unnukkut innalerneremi killiler-simaarneqarnissaat nalilerneqarpoq.
- [B] qasoqqalluni atuariartarmat, unnuami naammatsilluni sinittarnissaat nalilerneqarpoq.

## **Angajoqqaat oqaaseqaataat:**

Ulloq 26.04.2023 ataatasoq tusarneqarnermi isumaginninnikkut misissuinerit aaqqitassaqartinngilaa ajorinagulu.

Nalillineq siulleq ataataasup ajorinngilaa [B] oqaloqateqartalernissaa.

Naliliinerup tullia ataataminiginnarnissaa, ataataasup ajorinngilaa, qimaqqinnaviarnagillu oqaatigalugu.

Anaanaasoq aasamut juni-mi tikittussanngornerarpaa, illoqarfik [Å-mi] atuarnini naammassiguniuk. Illu attartugartik piseqaanerarpaa. Iniissarsiorlunili oqaatigalugu. Aalajangersimasumik suliffeqalernikuuvoq eqqaavilerusutut.

Naliliinerup pingajua ataataasoq aanngaajaarnitnik atornerluisuuneq pillugu katsorsartikkusuppoq. Arnaa uteqqittussangnformat isumaqatigiissimapput marluullutik katsorsartittariaqarlutik meeqqat pilligit. Ataataasoq 2013-mi katsorsartinnikuugaluarpoq nakkaateqqinnikuullunilu.

Naliliineq sisamaat [B] killinerneqarnissaa ataataasup suliuniutigivaa, qila-naaraalu arnaa tikinnissaa perorsaaqatigeeqqinnissamut suleqatigeeqqilernissamut, kisimiilluni inuuusuttuaranngulersumut killiliinissaq sakkortunaalaaramiuk, suna tamaat illu illuani suliariitigalugu.

Naliliineq tallimaat [B] sinilluartarnissaanut tunngatillugu ataataasup sinilluartarnissaa eqqumaaffigivaa.”

Isumaginninnermi misissuineq C pillugu 25. januar 2023-meersoq pigineqarpoq. Tassannga ersersinneqarpoq misissuineq aallartinneqarsimasoq 13. december 2022-mi naammassineqarsimanilu 19. maj 2023. Ilaatigut ersersinneqarpoq A'p 13. marts 2023-miit angajoqqaatut oqartussaassuseq kisimiilluni piglersimagaa. Misissuinermit ilaatigut ersersinneqarpoq:

“[...]

### **Ilaqtariinnut tunngasut attaveqarfiillu**

*Meeqqap oqaaseqaatai:*

Ulloq 10.03.2023 ikorsiissutinik sullissisoq nunaqarfik [Z-miinnerani] [C] oqaloqatiginerani oqariartuuteqarpoq ataataminiginnarusulluni, ataataminilluni ajorinnginnamiuk. Anaanani maqaasinerarpaa, ajoqutaanngitsorlu eqqaallugu. Angutaatitaarsimasorlu eqqaallugu.

Ulloq 10.05.2023 [C] oqaloqatiginninnermi oqaatigaa anaanani maqaasisarlugu, arnaa illoqarfik [Å-mi] ilinniariarluni aallarnikuuvoq ulloq 06.01.2023, tikippallu anaanani Targa-rluni ilaginiarlugu oqaatigaa.

Arnaa nunaqarfik [Z-mut] uteqqittussaavoq aasamut ilinniarnini naammasip-pagu, tikikkunilu [...-mut] praktikkernini nangikkiartussallugu [...] -mi.

*Angajoqqaat oqaaseqaatat:*

Ulloq 10.03.2023 ikorsiissutinik sullissisoq nunaqarfik [Z-miinnerani] ataataasoq oqaloqatiganerani oqaatigaa kisimiittunngornikuulluni. Arnaa [...] -mut aallarnikuusimalluni atuariartorluni. Ataataasup aallaqqinnissani takorluunngilaa, meeqqat angerlarsimanissaat pingaartillugu. Peqqissimissutigisimavaa meeqqat angerlarsimaffiup avataanut inissinneqarmata. Tullinnguunneqarsimasoq eqqavaa meeqqat børnehjemmemut inissinneqarnissaat, akuerineqarsimasullu. Takorloorsinnaannginnerarpaa tigummiunnaarnissai. Nammineq meeqqani qimak-kusunnagit eqqaallugu.

Ataataasup aappanilu qimannertik nammineq ajorinngilaa, sungiusimallugu nammineq suna tamaat illup iluani iganermi, isumagisarsimallugu. Kisiannili uteqqissagaluarpat anaanaasoq, nammineq ajorinagu.

Anaanaasup ataataasumut angajoqqaatut oqartussaaffik tunniutissallugu atsior-nikuusimasoq eqqaavaa, allakkallu nassiunneqarnikuusut, atsioreerunilu nammineq nassiunneqassasut rigsombudimut.

[...]

*Angajoqqaat oqaaseqaataat:*

[...]

Ataataasup meeqqat angerlarsimaffiup avataanut inissikkalarneri pillugit oqaatigaa meeqqat qimaqqikkusunnagit.

[...]

**Eqikkaaneq**

[C'p] angajoqqaavi [...] sulinerminni, nunaqarfik [Z-mi] ittukkuminni paari-neqarlutik najugaqarnerminni, qatasnngutaa [B] ittuminit kinguaassiutitigut qaangiiffigitinnerminik 20.11.2022 kingorna Isumaginninnikkut misissuineq aallartinneqarpoq. [C'p] qatanngutaata [B'p] ittuminiit kinguaassiutitigut qaangiiffigitereernerata kingorna angerlarsimaffiup avataanut qatanngutinilu arnaa akuersineratigut inissinneqaraluarput. Ullut 12 angajoqqaarsineereerlutik angajoqqaarsiaasut iperarusummatigut angajoqqaanut angerlarteqqinnejqarput.

Ataatartik kisimi ilagalugu nunaqarfik [Z-mi] najugaqarput, arnaa naluaat nunaqarfik [Z-mut] tikeqqissanersoq.

[...]"

**Suliamik naliliineq:**

Meeqqanut ilaqtariinnullu Ingerlatsivik, isumaginninnikkut misissuinermi oqaloqarnikkut oqaaseqaatillu aallerneremi pisaniit paasisat aallaavigalugit naliliivoq:

- [C] arnaminut maqaasinera oqaasinnguinissaat innersuunnarpooq, atuarfimmi maluginiarneqarsimammat, arnaminut maqaasinera peqqutaalluni suliaqartikkuminaattartoq.
- [C] angajoqqaarsianit iperarneqarnermi kingorna ataataminut uteqqinnerat, ataataasullu angajoqqaatut oqartussaassuseq tamakkiisoq tigummilernerani, illumillu attartugaqalerlutik ilaqtariillutik toqqissisimasumik ineqalernikuunertik, ataataalu nunaqarfimmi [Z-mi] suliffeqalernikuunera meeqqamut toqqissisimatitsimmat ataatamini najugaqarnissaat innersuussutigineqarpoq.
- Angajoqqaat aanngaajaarniutinik atornerluisuuneq pillugu katsorsartinnissaat innersuutigineqarpoq, meeqqat toqqissisimasumik angerlarsimaffeqarnissaat aalaakkaasumillu ulluinnaqarnissaat anguniarlugu.

**Angajoqqaat oqaaseqaataat:**

Ulloq 19.05.2023 ataataasoq tusarniarneqarnermi isumaginninnikkut misissuinerit aaqqitassaqaartinngilaa ajorinagulu.

[C] napparsimasoq kissarneqarnerarpoq. Arnaa tikinnissaanut qilanaarsuataarpoq.

Nalillineq siulleq arnaminut maqaasinera ersarinnerarpaa, qujanartumilli arnaa nunaqarfimmit [Z-mut] uteqqittussaanerarpaa.

Naliliinerup tullia ataatamigiinnarnissaat, ataataasup ajorinngilaa, qimaqqinnavarnagillu oqaatigalugu.

Naliliinerup pingajua ataataasoq aanngaajaarniutinik atornerluisuuneq pillugu katsorsartikkusuppoq. Arnaa [D] uteqqittussanngormat isumaqatigiissimapput marluullutik katsorsartittariaqarlutik meeqqat pillugit. Ataataasoq 2013-mi katsorsartinnikuugaluarpoq nakkaateqqinnikuullunilu."

Nalunaarsuilluni allattugaq 2. februar 2023-meersoq pigineqarpoq. Allattukkamit ersersinneqarpoq:

"Meeqqat arnaat [D] angajoqqaatut oqartussaasuuvoq. Massakkullu illoqarfimmi [A-mi] ilinniariarluni aallaqqavoq. Handleplan atsiorumanngimmagu afd.-lederimut [...] -mut fagchef-mullu qaquinneqarpoq.

[D] isumaqataanani handleplan atsiorusunngilaa. Meeqqat angajoqqaarsiaminnerminni iliuuserisimasaat eqqortuusorinngilaa, atsiorusunnagulu. Angajqqaatut oqartussaassuseq tamakkiisoq meeqqat ataataanut [A-mut] eqqartussivikkoorlugu suliassanngortissimanerarpaa.

Ataataasoq tusarniarneqarnermi tigummiinnarusullugit oqariartuuteqarpoq. Nunaqarfimmullu [Z-mi] nammineq illumik attartornikuummat ineqatigisinaallugit.

Ataatsimiinnermi aaliangiunneqarpoq meeqqat ataataminiginnassasut. Ataataa nunaqarfimmi [Z-miiginnartussaammat]. Anaanaasoq [D] angajoqqaatut oqartussaaneq ataatasumut tunniunnerani upternarsaammik piniartoqassaaq. Afgørelsesbrev allanngortinneqassooq."

B pillugu atuarfimmit oqaaseqaammik piniarnissamut immersugassaq 14. februar 2023-meersoq pigineqarpoq. Ersersinneqarpoq immersugassaq atuarfimmit immersorneqarsimasoq 20. februar 2023-mi.

Nalunaarsuinermi allattukkanit 23. februar 2023-meersumit erserpoq, meeqqat A-lu oqaloqtigineqarsimasut isumaginninnermi misissuinermut atatillugu.

Nalunaarsuilluni allattugaammit 7. marts 2023-meersumit ersersinneqarpoq, kommunimi sullissisoq arnaannik oqarasuaatikkut oqaloqtiginnissimasoq angajqqaatut oqartussaassutsip A-mut nuunneqarnissaa ingerlasoq pillugu, tassanga ersersinneqarpoq sullisisup oqarasuaatikkut isumaqatigiissusiorfigisimagaa A aqaguani pulaarniarlugu.

Nalunaarsuilluni allattugaatinit 10. marts 2023-meersumit erserpoq:

"Ataataasoq [B'p] aamma [C'p] angerlarsimaffiat pulaarparput. Angerlarsi-maffiat takuutigissallugu, ataatasullu isumaa tusarnissallugu aallaqqissanersoq. Meeqqallu qanoq innersut tusarniarlugit. Iseratta illu attartugaat nutaannginnera malunnarpooq, nateq igaffik nutaanngitsuupput, illu iserlugu nutaanngissun-ninnera malugineqarsinnaavoq. Taamaattoq illu angilaarpooq, marlunnik sinit-tarfeqarluni. Eqqiluippoq.

Ataataasoq kisimiittunngornikuusimavoq. Anaanaasoq [...] -mut aallarnikuusi-malluni atuariartorluni. Ataataasup aallaqqinnissani takorluunngilaa, meeqqat angerlarsimanissaat pingaartillugu. Peqqissimissutigivaa meeqqat angerlarsi-maffiup avataanut inissinneqarmata. Tullinnguunneqarsimasoq eqqaavara meeqqat børnehjemmemut inissinneqarnissaat tullinnguunneqarsimasoq, akuerineqarsimasullu. Takorloorsinnaannginnerarpaa tigummiunnaarnissai. Nammineq meeqqani qimakkusunnagit eqqaallugu.

[C] oqaloqatigivara, meeraq oqaloqatikkuminarpooq, ammallunilu. Ataataminiilernini ajorinngilaa ataataminiiginnarusullunilu. Anaanani maqaasisar-nerarpaa, ajoquutaanngitsorli eqqaallugu. Angutaatitaarsimasorlu allamik oqarluni, annerusumillu eqqaaqqinnagu.

[B] oqaloqatigaara aamma immikkut. Ataataminut angerlarnertik aamma ajorin-ngilaa. Namminerli nunaqarfimmi [Z-mi] najugaqarusunngikkaluarluni, aqqalussanili ataataminiitkkusullugu, nammineq aallarusukkaluarluni. Aperivara nassuiarsinnaaneraa, oqaaseqarfiginngiivippaali. Nassuaappara pingaarute-qartoq oqaluttuuppanga, sooq taamak kissaateqarneraluni. Oqaaseqanngiivip-poq.

Ataataasup eqqaasimavaa meeqqat oqaloqatiginerani, [B'p] ataatanani kamaat-tarsimagaa, pikkugalugu ikaarsaarnera malunnartoq. Taamaattumillu oqaaseqarfigimmagu aallarusunnerminut tunngatillugu, nalilersoruminaalluni. Ikaarsaarnini sakkortunaarsinnaammagu. Ernumanartumilli inisseqqanngilaq [B]. Oqaloqateqartarnissaminik pisariaqatitsinnginnerapoq. Ataataminullu uter-amik ajorinnginnerarlugu.

Ataataasoq naggataatigut naapeqqippara. Sulitilluni ajutoorsimalluni eqqaavaa, illoqarfik [X-mullu] nakorsiarsimalluni. Inissarsioraluarlutik nunaqarfimmi

[Z-mi] eqqaavaa, allatseqqallutillu ukiut marluk. Aappanilu qimannertik nammineq ajorinngilaa, sungiusimallugu nammineq suna tamaat illuap iluani iganermi, isumagisarsimallugu. Kisiannili uteqqissagaluarpat anaanaasoq, nammineq ajorinagu.

Eqqaavara meeqqat maanna ataataminni inissaqarmata, ulloq unnuarlu paaqqinniffimmut inissinnissaraluat suliaq nalilersorneqassasoq.  
Tutsaqarumaartugullu.

Anaanaasup ataataasumut angajoqqaatut oqartussaaffik tunniutissallugu atsior-nikuusimasoq eqqaavaa, allakkallu nassiunneqarnikuusut, atsioreerunilu nammineq nassiunneqassasut rigsombudsmandimut.

Tutsaqallattaassalluta isumaqatigiippugut.

Apeqquissaqanngimmata allanillu eqqartugassaqaratik, ingerlavugut."

Immersugassaq 30. marts 2023-meersoq pigineqarpoq isumaginninnermi nalili-ineq B pillugu nalunaarutiginninneq ulloq taanna tiguneqarsimasoq.

Isumaginninnermi pigaartup nalunaarusiaa 10. april 2023-imeersoq B pillugu.

Immersugassaq 11. april 2023-meersoq pigineqarpoq isumaginninnermi nalili-ineq B pillugu nalunaarutiginninneq ulloq taanna tiguneqarsimasoq.

Nalunaarusiorluni allattugaq 20. april 2023-meersoq pigineqarpoq, A-mik oqarasuaatikkut tusarniaaneq.

Nalunaarusiorluni allattugaq 21. april 2023-meersoq pigineqarpoq, A-mik oqaloqateqarneq B pillugu nalunaarutiginninneq pillugu.

Nalunaarusiorluni allattugaq 26. april 2023-meersoq pigineqarpoq, A tusarniaavigineqassasoq isumaginninnermi B-mik misissuineq pillugu.

Nalunaarusiorluni allattugaq ulluligaanngitsoq pigineqarpoq, isumaginninnermi misissuineq B pillugu naammassineqarnera matuneqartorlu 8. maj 2023-mi.

B pillugu iliuusissamik pilersaarummut missingiut pigineqarpoq, Iliuusissamut pilersaarut 8. maj 2023-mik ulluligaavoq. Immersugassap ilaata immersornera amigartoq. Iliuusissatut pilersaarut atsiorneqanngilaq.

Nalunaarsuilluni allattukkami 25. maj 2023-meersumi erserpoq:

"Ulloq 19.05.2023 ataataasoq tusarniarneqarnermini isumaginninnermi misissuinerit aaqqitassaqtinngilaa ajorinagulu.

[C] napparsimasoq kissarneqarnerarpaa. Arnaa tikinnissaanut qilanaarsuataarpooq.

Naliliinerit siuleq arnaminut maqaasisarnera ersarinnerarpaa, qujanartumillu arnaa nunaqarfik [Z-mut] uteqqittussaanerarpaa.

Naliliinerup tullia ataataminiiginnarnissaa, ataataasup ajorinngilaa, qimaqqinnaviarnagillu oqaatigalugu.

Naliliinerup pingajua ataataasoq aanngaajaarniutinik atornerluisuuneq pillugu katsorsartikkusuppoq. Arnaa uteqqittussangormat isumaqatigiissimapput marluullutik katsorsartittariaqarlutik meeqqat pilligit. Ataataasoq 2013-mi katsorsartinnikuugaluarpoq nakkaateqqinnikuullunilu."

Nalunaarsuilluni allattugaq 25. maj 2023-meersoq pigineqarpoq, A'p aamma C'p ullormi 10. maj 2023-mi oqaloqatignerat isumaginninnermi misissuinissap suliarineqarnissaa pillugu.

C-mut iliuusissatut pilersaarutip missingiut pigineqarpoq. Iliuusissatut pilersaarut 22. maj 2023-mik ulluligaavoq atsiorneqaranilu.

Nalunaarsuilluni allattugaq 9. juni 2023-meersoq pigineqarpoq, tassannga erserpoq:

"Ullumikkut aatsaat sianerfigaara, nassuaappra sullissisortaarisimagaannga. Sianerfigineqarusussimmasorlu paasillugu, meeqqanut oqartussaaffik pillugu. Angerpoq.

Nassuaallunilu eqqaartuussivimmut sianersimalluni, meeqqanut oqartussaaffik ataataanut tunniukkusulersimallugu. Eqqartuussivimmit akisimasut, taamaalioriaannaasut.

Aperivara ataataasorlu oqaloqatigiissimanersut, angerpoq. Tamarmillu akuersisimallutik ataataasup oqartussaaffik tigussagaa.

Ilisimatippara marluullutik politeeqarfiliassasut atsioriartorlutik. Isumaqatigiikkunik ajornanngitsoq politeeqarfikkoonnissaq. Allaassagaluartoq isumaqatigiissimanngippata, taava eqqartuussivik anguneqartartoq.

Paasinnippoq, meeqqat ataataat ilisimatissallugu oqarpoq, isumaqatigiippugullusianerfigeqqissagikka, tusarniarlugit killiffiat sumiinnersoq. Paasinnippoq."

Immersugassaq immersorneqarsimasoq 3. oktober 2023-meersoq pigineqarpoq, A'p nalunaarutigineqarnera pillugu isumaginninnikkut naliliineq ulloq taanna tiguneqarsimasoq.

A'p e-mailikkut naammagittaalliutaata ilangussartaanit tiguneqarsimasunit erseroq, sullisisup A-mut e-mailia 5. oktober 2023-meersoq. Tassannga ersersinneqarpoq B pillugu nalunaarutiginninnermik tigusaqartoqaqqissimasoq, sullisisullu A ulloq taanna nal. 11 oqaloqatigerusukkaa.

C'p angerlarsimaffiup avataanut inissinneqarnissaanut akuersinermut uppermarsaat immersugaq 23. oktober 2023-mik ulluligaq, pigineqarpoq. Akuersinermut uppermarsaat immersugaq atsiorneqarsimanngilaq. Aamma paasissutissanik aallersinnaanermut akuersissut immersugaq pigineqarpoq. Immersugaq 23. oktober 2023-mik ulluligaavoq atsiorneqaranilu.

A 23. oktober 2023-mi uannut naammagittaalliuteqarpoq, qitornami marluk angerlartinneqarnissaat pillugu kommune suli aalajangiisimanngimmat.

A'p naammagittaalliutaata ilangussartaasa akornanni sullisisup aamma A'p e-mailikkut allaqatigiissimaneranik imaqparyut. 30. oktober 2023 A sullissisumut ima allappoq:

"Hej. Meeqqat uanniilivitsinniarukkut, immersuvissamik pisinnaanerlunga? Ima-lunniit kommune peqarpa?"

Sullissisoq e-mailikkut A-mut 30. oktober 2023-mi ima akissuteqarpoq:

"Qujanaq allakkannut.

Mailikkut alassinnaavutit imaluunniit allakkakkut nassiuassinnaavat.

Angerlartitsiniarnermut tunngatillugu sooq angerlatikusunnerlugit nassuaas-suutit, suliniuteqarniarnersusi (assersuutigalugu SFU imarisai suliuniutigini-kuunerlusigit) suut angusimanerlugit, maannakkullu qanoq inissisimanersusi".

A-lu 30. oktober 2023-mi sullisisuminut ima allalluni:

"Allatarujussuara slettertooriga. Initaaarnissara qanilligaluarpoq nr 2 mi inissisi-mavunga, neqeroorfigitippunga november aallaqqaataani b-[...] nr 1 jusut tigun-ningipassuk uannut tunniunneqassasoq.

Illut allat aamma piariiliivipput. Sanasuniuna sulisuugama malinnaaffigilluarta-rakkit suliaat.

Meeqqat Angerlartivinnissai assut kissaatiginarpoq, anusinngoqqaangami angerlarsimaffiup avataanut inisseqqinnissai. Tamanguarmimmi uanniiginnaru-suleqqapput, [B] aamma ilanngulluni uanniikkusuppoq aniami angerlalerami. Ilinniarnini sakkortugigamiuk [...] -mi atuartuugaluarami. Allamik atuarusulluni aaliangeqqagami.

Sanasutut piukkoorpoq.

Oqaloqatigiinnerulernikuuvugut [B-lu], paniga ammariartornera iluareqaara. [C] oqaasinnguiuaannarpoq misigissutsiminik. Anaanannguani maqaasigaluarlugu pikkoreqaaq. Anaanasoq illoqarfik [Å-mi] praktikkilernikuuvooq, naluara uteqqisanersoq. Kisimiittuvunga, iluariinnarparali atornerluisoqanngitsoq illup iluani. Atuisooqataalertarnera qimmuppara. Meerannguakkami pingaartinnerullugit iluuseqartalernera aamma meeqqama malugivaat tussaneqarnerulerlutik. Initarnissarput qanillivoq. Initaaarnissattami tungaanut angerlarsimaffiup avataanut inissikkalaratsigit, immitsinnut tamaviaartiinnarluta. Akiligassanummi angummanniarluta taama aaliangeraluaratta anaanaasorlu. Sunaaffa avissaaliivilluta anaanaasorlu. Meeqqanut akisussaaffik uannut tunniuppa, atsioqatigiinnikkut. Nalorngikunjermik qanoq alassanerlunga. Taama allakkallaannarpunga."

Angajoqqaatut oqartussaassusillip akuerisaanik, C'p angerlarsimaffiup avataanut inissinneqarnissaanut innersuussineq 20. november 2023-meersoq pigineqarpoq. Innersuussisineq fagchefimit atsiugaavoq. Ilaatigut ersersinnejqarpoq:

"Meeqqanut Ilaqtariinnullu ingerlatsiviup Meeqqanut Ilaqtariinnullu Ataatsimiititaliamut inassutigaa meeraq pineqartoq:

- [C] cpr.nr.: [...], angerlarsimaffiup avataanut inissinneqarnissaa angajoqqaatut oqartussaassulik akuersiteeqqaarlugu angerlarsimaffiup avataanut inissiinissamut qinnuteqaat akuerineqassasoq.

aamma

"Pilersaarutaavoq Meeqqanik Ilaqtariinnermullu ingerlatsivimmuit sullisisut nunaqarfimmut [Z-mut] qanumut tusarniaajartorlutik angalanissaat. Pilersaarutigineqarpoq ataataasoq meeqqap pisariaqartitai soorlu perorsaari- aatsimut tunngasunik oqaloqatigineqarnissaa."

Innersuussinerup akuerineqarsimanera takussutissaqanngilaq.

23. november 2023-mi A'p naammagittaalliutini sulisuma ilaanut itisiliiffigivaa. A-mit oqaatigineqarpoq, siusinnerusukkut qitornani ilaqtariinnut paarsisartunut inissinneqarnikuusimagaluartut, kisianni ukioq sinnerlugu imminermini najugaqarsimasut. A-mit aamma oqaatigineqarpoq 2023-mi oktoberip qiteqqunnerani kommunimut noqqaassutigisimallugu qitormi angerlartinneqarnissaat.

Kommunimut 22. december 2023-mi noqqaassuteqarpunga, kommune A-mit qitornami angerlartinneqarnissaat pillugu noqqaassummik tigusaqarsimanersoq, taamaattoqarsimappallu suliap suliarineqarnerata killifianik nalunaarfingineqarnissannik.

Kommunimit akissuteqarfingineqarpunga 8. januar 2024-mi. Kommunimit oqaatigineqarpoq A'p allakkatigut qitornami angerlartinneqarnissaat pillugu noqqaassummik 30. oktober 2023-mi tigusaqarsimallutik. Tassunga atatillugu kommunimit oqaatigineqarpoq:

"Meeqqaqut Ilaqutariinnullu Ingerlatsivik piffissami tamatumani unamminartorsiorsimavoq napparsimasoqarneranit aamma sillissisusunik amigaateqarnikkut suliap ingerlanneqarneranik tigusisinnaasunik. Taamatullu aamma Meeqqaqut Ilaqutariinnullu Ingerlatsivik angerlarsimaffimmi pissutsinik misisuisinnaasumik nunaqarfimmum [Z-mukartitsinissamik] unamminartorsiorsimaluni. Tamatumunnga atatillugu Meeqqaqut Ilaqutariinnullu Ingerlatsivik kommunip nunaqarfiinut illoqarfiillu sinnerinut ukkatarinnittussamik sullissisumik angalarsartussamik atorfinitssimavoq.

Meeqqaqut Ilaqutariinnullu Ingerlatsiviup [A'p] piffissaq utaqqisinneqarfingisaq pillugu maanna tunngavilersuutigineqartut tunngavigalugit ajuusaarutigaa, kisianni Ingerlatsivimmit [A'p] [B'p] aamma [C'p] angerlartinneqarnissaat pillugu qinnuteqaataa sallitillugu suliarineqassaaq."

Allakkatigut 30. januar 2024-mi kommune qinnuigivara, A'p qitornani ukioq ataaseq sinnerlugu immini najugaqartissimaneri pillugit oqaaseqaasioqqullugu, tassani kommune angerlartitsinissamut aalajangiisimanngimmat. Siusinnerusukkut oqaaseqaatiga 2023-5 innersuussutigaara, tassani sakkortuumik assuarliutigakku, kommune angerlartitsinissamik aalajangiisimannginnera meeqqat inis-sinneqarsimasut angerlannginneranni, kiisalu aamma kommunimit inissiineq pillugu aalajangikkamik atuutsitsisimannginnera, kommunip angerlartitsinissamik aalajangiissuteqarnerata tungaanut.

Immersugassaq immersorneqarsimasoq 22. marts 2024-meersoq, B pillugu nalunaarutiginnineq tunngavigalugu isumaginninnikkut naliliineq suliarineqarsi-masoq ulloq taanna tiguneqartoq.

Kommunimit akeqqullunga nukingisaaruteqarpunga 9. april 2024-mi.

Kommunimit 11. april 2024-mi nalunaarutigineqarpoq, kommunimit suliaq misis-sorneqartoq, sapaatillu akunnerani 17-imni uterfiginiarlugu.

Kommunimit oqaaseqaat 25. april 2024-mi imaattoq tiguara:

**"Suliap ingerlariaqqinnissaanut ilisimatitsissut**

Meeqjanut Ilaqtariinnullu Ingerlatsivimminngaaniit ilisimatitsissutigissavarput [A] angerlartitsinissamut qinnuteqaataa Meeqjanut Ilaqtariinnullu Ingerlatsivimminngaaniit aallartinneqartussaanikuugaluarmat peqquteqartumilli nunaqarfimmut [Z-mut] angalanissat ingerlanneqarsinnaanngimmata rejsende sagsbehandlereqalernissaq utaqqisinneqarnikuuvooq.

Maannamut pilersaarutit imaapput:

- 6. majimiit 8. maj tungaanut rejsende sagsbeandler nunaqarfimmut [Z-mukassooq] meeqqamik angajoqqaamillu oqaloqatiginnikkiaortorluni meeqqat angerlarsimaffimmi qanoq innersut aammalu meeqqat angerlarsimanerat ataataasumut qanoq innersoq tusarniarlugit.
- Nunaqarfimmi [Z-meereernerup] kingorna rejsende sagsbeandler qinnuteqaasiussaaq angerlartitsinissaq akuerineqassanersoq imaluunniit itigartitsissutigineqassanersoq aalajangiisussap, tassa pisortap aaliangis-suaa.
- Angerlartitsinissaq akuerineqarpat aaliangiinermut allagaqaasiortoqassoq tassanngaanniillu meeqqat angerlartutut system iluani nalunaars-oqqlissapput.
- Kisianni angerlartitsinissaq itigartitsissutigineqassagaluarpat suliap killifianuit [A] suleqatiginiarneqaqqaartussaavoq.

Nunaqarfimmut [Z-mut] tikeraareernerup kingorna suliaq nalilersorneqaqqit-tussaassooq piaartumilli aaliangiisoqarnissaanut qinnuteqaasiortoqarumaarpoq maannakkut ulluleqqissaarsinnaanngikkaluagit, kisianni naatsorsutigineqarsin-naavoq qaammatit marluk iluanni angalalanerit allaffisornerillu piumaartut.

Kommune 6. maj 2024-mi noqqaaffigaara suliami allagaatit tamaasa piumallugit.

Kommunilu oqaaseqaasioqqullugu makkua oqaatigaakka:

"Pingaartumik kommunip oqaaseqaatimi paassisutissiissutigissavai makkua:

1. Kommuni qunnuigaara meeqqat angerlarsimaffiup avataanut ulloq inissinneqarfiat paassisutissiissutigeqqullugu, tassunga ilanngullugu [A'p] angajoq-qaatulluunniit oqartussaassusermik pigisaqartup allap akuersineratigut pisimanersoq imaluunniit akuersititseqqaarani pisimanersoq.

2. Kommuni qinnuigaara meeqqat [A-mi] najugaqalerfiata ullua paasissutisiissutigeqqullugu, qanga meeqqat [A-mi] najugaqalersimanersut.
3. Kommuni qinnuigaara suliap ingerlanneqarnerani nikeriaateqartarnerit tamaasa piffissalersukkamik suliaqassasoq, meeqqat [A-mut] angerlarlutik najugaqalererannut ataattillugu kommuni qanoq iliuuseqartarsimanersoq.
4. Kommuni qinnuigaara paasissutissiissutigeqqullugu angerlartitsinissaq pil-lugu, meeqqat [A-mut] nuunnerat sioqqullugu, kommunip aalajangiisimanceranut suna tunngaviunersoq.

Tassunga atatillugu innersuussutigaara, kommunimit angerlartitsinissaq sioqqullugu aalajangiinermi pissutsit pingaarutillit qulaajaavagineqaqqartussaammata. Taanna ersersinneqarpoq Inatsisartut inatsisaanni nr. 20, 26. juli 2017-meersumi § 41, meeqqat meeqqat tapersorsorneqartarnerat pil-lugu, kingusinnerusukkut allanguutitalik (matuma kingorna meeqqat tapersorsorneqartarnerat pillugu inatsit).

Meeqqat tapersorsorneqarnerat pillugu inatsisip § 41, imm. 1-mi ersersinneqarpoq, angerlarsimaffiup avataani inissiinerup atorunnaarsinneqarnissaa pillugu communalbestyrelsip aalajangiinissaa sioqqullugu, communal-bestyrelsip kulakeersimassavai, angajoqqaatut oqartussaassusillip meeqqap pisariaqartitaanik naammassinnissinnaanissaa, meeraq oqaloqatigineqarsi-massaaq, inissiiviusumit allaganngorlugu oqaaseqaammik pissarsinirtoqarsimassaaq, meeqqap angajoqqaallu angerlartitsinissamut piareersarlu-arsimanissaat kulakeerneqassaaq, angerlartitsinissamut iliuusissatut pilersaarusiortoqarsimanera kiisalu meeqqap angajoqqaatullu oqartussaassusillip piffissami angerlartitsinerup siuningngua kingornalu meeqqap attaveqarfingisartagarisinnaasaasa ikiorneqarnissamik piareersaasoqarsimanissaa."

Nalunaarsuilluni allattukamit 6. maj 2024-mi quleqtsikkami "Hjemmebesøg til hjemgivelsessag Z" ersersinneqarpoq:

"Pilersaarut malillugu ullumi angerlarsimaffimmut pulaartoqarpoq, suliaq meeqqani angerlartitsiniarneq pillungu. Ilaqtariit angerlarsimaffiat enfamiliehus marlunnik sinittarfilik. [A] aamma [C] sinittarfeqatigiittarnerarput, [B] inimi

kisimi sinikkajunnerusarluni fjernsyn/film nakkutiginerusarlungit. [A] angajullequtaa sinittarfik aamma atorpaa. [B-gooq] ilaatigoorluni ataataminut innarartortarpooq. Angerlarsimaffik torerpoq aamma meeqqat isumannangillaq angerlartinneqarnissaannut, ataataasup [A'p] meeqqat isumagilluarpai. [A] Royal Greenland sulivoq. Meeqqat atuarfimmi atuarpoq. [B] elevhjemmesaaq august. Meeqqat inissismalluarpasipput ataataminni. Meeqqat angerlarsimaffiup avataanut inissinneqarpoq nov/de 2022. kisiat sivikkittuaqqami meeqqat inissismasimapput soorlu sapaatip akunneri pingasut missaat. Meeqqat aqangu oqaloqtigineqassapput angerlartitsiniarneq pillungu."

Meeqqat A-mut angerlartinneqarnissaat pillugu innersuut 7. maj 2023-meersoq pigineqarpoq.

Nalunaarsuilluni allattugaatinit 8. maj 2024-meersoq pigineqarpoq. Allattukkami allassimavoq:

"meeqqat isumasiorlungit oqaloqtigineqarput angerlartitsiniarneq pillungu. Meeqqat namminneerlutik kissaatigivaat ataataminnut angerlarnissartik. Tamanalu tusaatissatut tiguneqarpoq."

Kommunimit suliaq pillugu malitseqartitsissut 10. maj 2024-mi imaattoq tiguara:

**"Una pillugu: [A] pillugu naammagittaalliut, nanginna.**

**Nunaqarfik [Z-mi] angalanerup kingorna aalajangikkat.**

Ulloq 25. april 2024 allakkatigut nalunaarutiginikuuvaput, qulaani pineqartoq pillugu nunaqarfimmukareerpat allakkatigut killiffimmik paassisutissiissalluta. Massakkut angalasimasoqarsimalerpoq, kiisalu suliamik tigummiaqartoq maannamut killiffiusumik imatut paassisutissiivoq.

Ulloq 6. maj 2024 ilaqtariinnik suliaqartoq angerlarsimaffimmut pulaarpoq, piumasagaataasut malillugit nalilersuineq ingerlanneqarpoq, kiisalu angerlarsimaffik aaamma misissorneqarluni, naliliinerlu malillugu akuerineqarluni.

Ulloq 8. maj 2024 [B] oqaloqtigineqarpoq, kiisalu august 2024 elevhjemmernisa saa ilanngullugu eqqartorneqarluni.

Oqaloqatigiissutigineqartussat nalilersuinerillu malillugit siuariartoqarsimanera takuneqarsinnaalluarpoq. Meeqqat angerlarsimaffimmi toqqisisimallutik inooqataapput, kissataat malillugu ataataminnut angerlaqqinnissaat tusaatis-satut tigullugu sagsfremstilling sananeqassaaq tapersiinermik siunertalik.

Ulloq 7. maj 2024 sagsfremstilling sananeqarpoq, meeqqanik angerlartitsinissa-mik siunertalik, taannalu akuerineqarpoq.

Massakkut angerlartitsiniarnermut aalajangiinissamut allakkiaq manna isumagi-neqarpoq, nassiunneqassalluni meeqqat angutaannut [E-mut] [A-mik allaqqa-sussaasoraara, uanga nammineq naqqiutiga]. Aamma ilaqtariit BFC-mut in-nersuunneqarnissamik akuersipput ilaqtariit malinnaaffigineqarlutik. Taamaa-silluta suliaq maanngaannik naammassivarput."

Kommunip allagaa 10. maj 2024-meersoq, meeqqat A-mut angerlartinneqarnis-saat pillugu kommunip aalajangiinera ullormi 10. maj 2024-mi ilanngunneqarsi-masoq.

Kommunip oqaaseqaateqarnissaa pillugu aamma suliami allagaatit nassiunne-qarnissaat pillugu 20. juni 2024-mi nukingisaaruteqarpunga. Ulloq taanna kom-mune akissuteqarpoq, kommunimit akissutissaq suliarineqaleruttortoq, sapaatillu akunnerata tulliani uterfigineqassasoq.

Kommunimit oqaaseqaat 25. juni 2024-mi tiguara ulloq taanna oqaaseqaasiaq. Oqaaseqaammit ersersinneqarpoq:

"Matumuuna nalunaajaat

1. Ilanngunneqartumi, meeqqat [C] aamma [B] angerlarsimaffiup avataanut inissinneqarnissaannut anaanaasoq piffimmi tassani angajoqqaatut oqar-tussaassuseqartoq akuersilluni atsiorpoq, ulluneqartumi 24. november 2024. Angajoqqaatut oqartussaassuseq [A-mit] tiguneqarpoq 13. marts 2023.

Meeqqat 2. december 2022-mi illoqarfimmi [X-mi] ilaqtariinnut paarsisar-tunut inissinneqarput.

2. Meeqqat angajoqqaatik juullisioqatigissallugit angajoqqaaminnut 22. de-cember 2022-mi angerlarput, angajoqqaat marluullutik nunaqarfimmit [Z-

miit] illoqarfimmut [X-mukarput], tassanilu [D'p] paasivaa meeqqat ilaqua-riit paarsisartunit iperarniarneqartut sullissumiillu maannakkut sulissutigi-neqartoq meeqqat ulloq unnuarlu paaqqinniffimmut inissinneqaannarnissaat. Meeqqat ulloq unnuarlu paaqqinniffimmut inissinneqarnissamik tungaanut angajooqqaaminnut angerlarallartinneqarput.

3. [A] meeqqallu nunaqarfik [Z-mi] oqaloqatigineqarput 23. juni 2023-mi (anaanaasoq illoqarfimmut [Å-mut] nuussimavoq). [C'p] aamma [B'p] ki-isalu [A'p] oqaloqatigereerneranni sullissisumit nalunaarutigineqarpoq, ulloq unnuarlu paaqqinniffimmut inissiinissap taamaatinnissaa sulissutigineqas-sasoq.
4. Suna pillugu maj 2024 sioqquillugu angerlartitsinissamik aalajangiinerup pisimannginnera sullisisut amigarnerannik peqquuteqarpoq. Angerlartitsineq pillugu aalajangiinermi allagaq ilanngussatut ilanngunneqarpoq."

Kommunip oqaaseqaataanut ilanngunneqarsimapput meeqqat angerlarsimaffiup avataanut inissinneqarnissaannut akuersissutit marluk 24. november 2022-me-ersut. Meeqqat tamarmik immikkut. Akuersissut arnaannit atsiugaavvoq. Aamma kommunip oqaaseqaataanut ilanngunneqarsimavoq kommunip aalajangiinera 10. maj 2024-mi meeqqat angerlartinneqarnissaat pillugu. Aalajangiineq A-mut tunngassuteqarpoq.

Kommune 11. juli 2024-mi noqqaaffigaara suliami allagaatit tamakkerlugit nas-siuteqquillugit, isumaqarama suliami allagaatit tamakkiisut tigusimanagit.

Ulloq taanna kommunimit nalunaarfigineqarpunga, kommunimit suliami alla-gaatit tamaasa katarsiorarlugit nassiunneqassasut.

Meeqqat immikkoortillugit suliami allagaatitai tiguakka 16. juli 2024-mi.

Kommune allagatinik allanik noqqaaffigeqqippa 3. september 2024-mi. Tama-tumani innersuussutigaara allagaatit tigusimasama akornaniinngimmata as-sersuutigalugu kommunip inissiinermik aalajangiinera kiisalu tamanna pillugu su-

liap ingerlanneqarsimanera, meeqqat oqaloqatigineqartarnerat inissiinissaq pil-lugu nalunaarsuilluni allattugaatit, inissiinerup nalaani angerlartitsinermi kiisalu nalunaarutiginninnerit pillugit kommunimit tiguneqarsimasut. Kommunimit paa-sissutissiissutigequara maannamut nassiunneqareersut saniatigut allagaatinik allanik tigummiaqannginnerlutik nalunaarutigeqqullugu. Naggataatigullu kom-munimit paasissutissiissutigequara, kommuni meeqqat tungaannut angerlartin-neqarnissaat pillugu naammagittaallior-nissamut ilitsersuutitalimmik aalajangiisi-manersut.

Kommunip akissutaa 5. september 2024-mi tiguara. Allakkanut ilanngunneqar-simavoq oqaaseqaat 10. maj 2024-meersoq kiisalu meeqqat angerlartinneqar-nissaat pillugu kommunip aalajangiinera 10. maj 2024-meersoq, 10. maj 2024-mi togoriigara. Kommunimit akissummi oqaatigineqarpoq, suliami paasissutissat pillugit noqqaassutiga tunngavigalugu ilanngunneqartut nassiunneqartut, aam-malu allanik apeqqutissaqaruma commune attavagineqarsinnaasoq.

Kommunip oqaaseqaataa 25. juni 2024-meersoq A-mut 12. september 2024-mi tusaniaassutigalugu nassuppara. A-mit uparuaammik tigusaqanngilanga.

Sulisuma ilaaniit 24. september 2024-mi kommunimi sulisoq oqarasuaatikkut at-tavagineqarpoq. E-mailera 3. sptember 2024-meersoq kiisalu kommunip akis-sutaa 5. september 2024-meersoq innersuussutigalugit sulisuma ilaat kommunip sulisuanut apeqqutinut akissutigineqartussamik ujartuivoq, tamatumunnga ilanngullugu suliami allagaatit tamakkiisumik tigusimanerikka. Kommunimi su-lioq suliamik misissuiniarpoq uterfiginiarlungalu.

Suliami allagaatit kommunimit 7. oktober 2024-mi tiguakka.

Suliami allagaatit tigusama akornanni nassaassaqanngilaq meeqqanut angerlar-titsinermik aalajangiinermik naammagittaallior-sinnaanermik ilitsersuutitalimmik aalajangiisoqarneranut tunngasumik. Taamatullu aamma takussutissaqanngilaq kommune naliliisimanersoq, angerlartitsinissaq pillugu aalajangiinermik meeqqat ataasiakkaarlugit nalunaarfingineqassanersut.